

元

史

二

五

六

七

本紀卷第三

元史三

翰林學士帝矣知制誥兼修國史臣宋濂

翰林待制承直郎兼國史院編修官臣王禕

纂奉

勅修

憲宗

憲宗桓肅皇帝諱蒙哥睿宗拖雷之長子也母曰莊

獻太后怯烈氏諱唆魯禾帖尼歲戊辰十二月三日

生帝時有黃忽荅部知天象者言帝後必大貴故以

蒙哥爲名

蒙哥華言長生也

太宗在潛邸養以爲子屬昂灰

皇后撫育之既長爲娶火魯剌部女火里差爲妃分

之部民及睿宗薨乃命歸藩邸從征伐屢立奇功嘗

攻欽察部其酋八赤蠻逃于海島帝聞亟進師至其地適大風刮海水去其淺可渡帝喜曰此天開道與我也遂進屠其衆擒八赤蠻命之跪八赤蠻曰我爲一國主豈苟求生且身非駝何以跪人爲乃命囚之八赤蠻謂守者曰我之竄入于海與魚何異然終見擒天也今水迴期且至軍宜早還帝聞之即班師而水已至後軍有浮渡者復與諸王拔都征斡羅思部至也烈贊城躬自搏戰破之歲戊申定宗崩朝廷久未立君中外恟恟咸屬意於帝而覬覦者衆議未決諸王拔都木哥阿里不哥唆亦哥禿塔察兒大將兀

良合台速你帶帖木迭兒也速不花咸會于阿剌脫
忽刺兀之地拔都首建議推戴時定宗皇后海迷失
所遣使者八剌在坐曰昔太宗命以皇孫失烈門爲
嗣諸王百官皆與聞之今失烈門故在而議欲他屬
將寘之何地耶木哥曰太宗有命誰敢違之然前議
立定宗由皇后脫忽列乃與汝輩爲之是則違太宗
之命者汝等也今尚誰咎耶八剌語塞兀良合台曰
蒙哥聰明睿知人咸知之拔都之議良是拔都即申
令於衆衆悉應之議遂定

元年辛亥夏六月西方諸王別兒哥脫哈帖木兒東

方諸王也古脫忽亦孫哥按只帶塔察兒別里古帶
西方諸大將班里赤等東方諸大將也速不花等復
大會于闊帖兀阿闌之地共推帝即皇帝位於斡難
河失烈門及諸弟腦忽等心不能平有後言帝遣諸
王旭烈與忙可撒兒帥兵覘之諸王也速忙可不里
火者等後期不至遣不憐吉解率兵備之遂改更庶
政命皇弟忽必烈領治蒙古漢地民戶遣塔兒幹魯
不察乞刺賽典赤趙壁等詣燕京撫諭軍民以忙哥
撒兒爲斷事官以孛魯合掌宣發號令朝覲貢獻及
內外聞奏諸事以晃兀兒留守和林宮闕帑藏阿藍

荅兒副之以牙刺瓦赤不只兒幹魯不覩荅兒等充
燕京等處行尚書省事賽典赤匿智馬丁佐之以訥
懷塔刺海麻速忽等充別失八里等處行尚書省事
暗都刺兀尊阿合馬也的沙佐之以阿兒渾充阿母
河等處行尚書省事法合魯丁匿只馬丁佐之以茶
寒葉了干統兩淮等處蒙古漢軍以帶荅兒統四川
等處蒙古漢軍以和里斛統土蕃等處蒙古漢軍皆
仍前征進以僧海雲掌釋教事以道士李真常掌道
教事葉孫脫按只斛暢吉爪難合荅曲憐阿里出及
剛疙疸阿散忽都魯等務持兩端坐誘諸王爲亂並

伏誅遂頒便益事宜於國中凡朝廷及諸王濫發牌
印詔旨宣命盡收之諸王馳驛許乘三馬遠行亦不
過四諸王不得擅招民戶諸官屬不得以朝覲爲名
賦歛民財民糧遠輸者許於近倉輸之罷築和林城
役千五百人冬以宴只吉帶違命遣合丹誅之仍籍
其家

二年壬子春正月辛失灰之地遣乞都不花攻末來
吉兒都怯寨皇太后崩夏駐蹕和林分遷諸王於各
所合丹於別石八里地蔑里於于葉兒的石河海都
於海押立地別兒哥於曲兒只地脫脫於葉密立地

蒙哥都及太宗皇后乞里吉忽帖尼於擴端所居地
之西仍以太宗諸后妃家貲分賜親王定宗后及失
烈門母以厭穰事覺並賜死謫失烈門也速孛里等
於沒脫赤之地禁錮和只納忽孫脫等於軍營秋七
月命忽必烈征大理諸王禿兒花撒丘征身毒怯的
不花征沒里奚旭烈征西域素丹諸國詔諭宋荆南
襄陽樊城均州諸守將使來附八月忽必烈次臨洮
命總帥汪田哥以城利州聞欲爲取蜀之計冬十月
命諸王也古征高麗帝駐蹕月帖古忽闌之地時帝
因獵墮馬傷臂不視朝百餘日十二月戊午大赦天

下以帖哥紬闊闊朮等掌帑藏孛闌合剌孫掌幹脫
阿忽察掌祭祀醫巫卜筮阿剌不花副之諸王合剌
薨以只兒幹帶掌傳驛所需孛魯合掌必闌赤寫發
宣詔及諸色目官職徙諸匠五百戶脩行宮是歲籍
漢地民戶諸王旭烈薨

三年癸丑春正月汪田哥修治利州且屯田蜀人莫
敢侵軼帝獵于怯蹇义罕之地諸王也古以怨襲諸
王塔剌兒營帝遂會諸王于幹難河北賜予甚厚罷
也古征高麗兵以札剌兒帶爲征東元帥遣必闌別
兒哥括幹羅思戶口三月大兵攻海州戍將王國昌

逆戰于城下敗之獲都統一人夏六月命諸王旭烈兀及兀良合台等帥師征西域哈里發八哈塔等國又命塔塔兒帶撒里土魯花等征欣都思怯失迷兒等國帝幸火兒忽納要不花之地諸王拔都遣脫必察詣行在乞買珠銀萬錠以千錠授之仍詔諭之曰太祖太宗之財若此費用何以給諸王之賜王宜詳審之此銀就充今後歲賜之數秋幸軍腦兒以忙可撒兒爲萬戶哈丹爲札魯花赤九月忽必烈次忒刺地分兵三道以進冬十二月大理平帝駐蹕汪吉地命宗王耶虎與洪福源同領軍征高麗攻拔禾山東

州春州三角山楊根天龍等城是歲斷事官忙哥撒兒卒

四年甲寅春帝獵于怯蹇义罕夏幸月兒滅怯之地遣札刺亦兒部人火兒赤征高麗秋七月詔官吏之赴朝理筭錢糧者許自首不公仍禁以後浮費冬大獵于也滅干哈里义海之地忽必烈還自大理留兀良合台攻諸夷之未附者入覲於獵所是歲會諸王于顆顆腦兒之西乃祭天于日月山初籍新軍帝謂大臣求可以慎固封守閑於將畧者擢史樞征行萬戶配以真定相衛懷孟諸軍駐唐鄧張柔移鎮亳州

權萬戶史權屯鄧州張柔遣張信將八漢軍戍潁州
王安國將四千戶渡漢南深入而還張柔以連歲勤
兵兩淮艱於糧運奏據亳之利詔柔率山前八軍城
而戍之柔又以渦水北隘淺不可舟軍旣病涉曹濮
魏博粟皆不至乃築甬路自亳抵汴堤百二十里流
深而不能築復爲橋十五或廣八十尺橫以二堡戍
之均州總管孫嗣遣人賫蠟書降且乞援史權以精
甲備宋人之要遂援嗣而來其後驍將鐘顯王梅杜
柔表師信各帥所部來降

五年乙卯春詔徵逋欠錢穀夏帝幸月兒滅怯土秋

九月張柔會大帥于符離以百丈口爲宋往來之道
可容萬艘遂築甬路自亳而南六十餘里中爲橫江
堡又以路東六十里皆水可致宋舟乃立柵水中惟
密置偵邏於所達之路由是鹿邑寧陵考柘楚丘南
頓無宋患陳蔡穎息皆通矣是歲改命劄刺解與洪
福源同征高麗後此又連三歲攻拔其光州安城中
州玄鳳珍原甲向玉果等城

六年丙辰春大風起北方砂礫飛揚白日晦冥帝會
諸王百官于欲兒陌哥都之地設宴六十餘日賜金
帛有差仍定擬諸王歲賜錢穀忽必烈遣沒兒合石

詣行在所奏請續簽內郡漢軍從之夏四月駐蹕于
蒼密兒五月辛酉刺兀魯朶六月太白晝見辛解亦
兒阿塔諸王亦孫哥駙馬也速兒等請伐宋帝亦以
宋人違命因使會議伐之秋七月命諸王各還所部
以居諸王塔察兒駙馬帖里垓軍過東平諸處掠民
羊豕帝聞遣使問罪由是諸軍無犯者是歲高麗國
王細嗟甫雲南酋長摩合羅嗟及素丹諸國來覲兀
良合台討白蠻等克之遂自昔八兒地還至重慶府
敗宋將張都統賜金縷織文衣一襲銀五十兩綵帛
萬二百匹以資軍士冬帝駐蹕阿塔哈帖乞兒蠻以

阿木河回降民分賜諸王百官

七年丁巳春幸忽闌也兒吉詔諸王出師征宋乞都不花等討末來吉兒都怯寨平之夏六月謁太祖行宮祭旗鼓復會于怯魯連之地還幸月兒滅怯土秋駐蹕于軍腦兒醞馬乳祭天九月出師南征以駙馬刺真之子乞解爲達魯花赤鎮守幹羅思仍賜馬三百羊五千回鶻獻水精盆珍珠傘等物可直銀三萬餘錠帝曰方今百姓疲弊所急者錢爾朕獨有此何爲却之賽典赤以爲言帝稍償其直且禁其勿復有所獻宗王塔察兒率諸軍南征圍樊城霖雨連月乃

班師元帥卜隣吉解軍自鄧州略地遂渡漢江冬十一月兀良合台伐交趾敗之入其國安南主陳日熈竄海島遂班師遣阿藍荅兒脫因囊加台等詣陝西等處理筭錢穀冬帝度漠南至於玉龍棧忽必烈及諸王阿里不哥八里土出木哈兒玉龍塔失昔烈吉公主脫滅干等來迎大燕既而各遣歸所部

八年戊午春正月朔幸也里本朶哈之地受朝賀二月陳日熈傳國于長子光昺光昺遣堦與其國人以方物來見兀良合台送詣行在所諸王旭烈兀討回回哈里發平之禽其王遣使來獻捷帝獵于也里海